

Siunnersuut: 2016-imi Arctic Winter Gamesimik Kalaallit Nunaata aaqqissuisuunissaa aammalu 2013-imut aningaasanut inatsimmi ukiunilu missingersuusiorfiusuni tassunga aningaasanik immikkoortitsisoqarnissaa pillugit Inatsisartut akuersinissaannik aalajangiiffigisassaatus siunnersuut

(Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoq)

Saqqummiussissut

(Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoq)

Siullermeerneqarnera

Matumuuna Naalakkersuisut Kalaallit Nunaata 2016-imi Arctic Winter Gamesimik aaqqissuussinissaannik aamma 2013-imi ukiunilu missingersuusiorfiusuni aningaasanut inatsimmut tamatumunnga immikkoorsisoqarnissaannik aalajangiiffigisassatus siunnersuut saqqummiuppaat.

Paasissutissanut aalajangiiffigisassatus siunnersuummi takuneqarsinnaasunut naleqqiullugu paasissutissat makku ilassutigineqarput.

2016-imi AWG-mut aningaasartuutissat tamarmiusut 44,5 mio. kr-iusussatus missingerneqarput. Aningaasartuutit taakku Namminersorlutik Oqartussanit Kommuneqarfik Sermersuumillu avinneqassapput, tamarmik affaat akilerlugit.

Aningaasanut inatsimmi 2011-2015-imi immikkoortitaapput 15,8 mio. kr., aalajangiunneqarporlu 6,5 mio. kr. sinneruttut 2016-imut immikkoortinneqassasut. Tamanna 2013-imut aningaasanut inatsimmi ersissaaq.

Kalaallit Nunaata ukiumut AWG-mut akiliutai 200.000 kr-iupput. Ajuusaarnaraluartumik aningaasartuutit taakku kontomi pingaarnermi 30.19.20 Arctic Winter Games aamma Island Gamesimi ataatsimut aningaasaliissutinut ilanngunneqarsimanngillat. Ilaqutariinnut, Kultureqarnermut, Ilageeqarnermut Naligiissitaanermullu Naalakkersuisoqarfiup aningaasaliissutaareersut iluanni ukioq manna 200.000 kr. pineqartut aningaasaliissutigissavai.

2013-imut Aningaasanut Inatsisip suliarineranut atatillugu Naalakkersuisoqarfik aningaasaliissutit ukiumut 200.000 kr-nik qaffannissaannik qinnuteqassaaq.

Taama oqaaseqarlunga aalajangiiffigisassatus siunnersuut Inatsisartunut oqallisigisassanngortippara, oqallittoqarluarnissaalu qilanaaralugu.